

## AMORIYUA.



Nere iritziz amoriyua da su biziya  
 Ur piskarekin iñola ondo itzal eziña,  
 Biotzera da sartzen gogorki orlako miña  
 Non jartzen duben amoriyozko iltzez josiya  
 Bizi maitia galtzez beregan oso etsiya;  
 Buruz nasturik iduki oi du bakardadean  
 Naiz izan gizon indartsua, chit argaldurikan,  
 Bada oyea egonagatik esnaturikan  
 Edo lo erdi amets egiñaz daguenean  
 ¡Gizagaisoa! jartzen du iñoiz buruz lanean.

. . . . .

Minchu jartzen da, eta sendakiñ on baten billa  
 Doa lasterka *Bayona* edo *Paris* aldera,  
 Bañan andikan lengo miñ eta lengo antzera  
 Biurturzen da indarrik gabe ta erdi illa  
 Esanaz, orla bizitze arren chit ill nadilla;  
 Noizbait bear ta arkitutzen du sendakinchua  
 Galdetzen digo, ¿nik zer gaitz detan esan zadazu?  
 Eranzunikan, esango dizut, ichedon zazu,  
 Zure gaitza nik neronek daukat ezagutua,  
 Ez ikaratu, ez da besterik, amoriyua.

JUAN IGNAZIO URANGA.

